

四庫全書

子部

欽定四庫全書

子部
經濟類編卷八十

詳校官中書臣瞿照

主事臣祁韻士覆勘

總校官知縣臣繆琪

校對官中書臣宋鏞

謄錄監生臣施華

欽定四庫全書

經濟類編卷八十

明 馮琦馮瑗 撰

地類二

封建 四十則

周成王與唐叔虞燕居剪梧桐葉以為珪而授唐叔虞曰余以此封汝唐叔虞喜以告周公周公以請曰天子封虞耶成王曰予一與虞戲也周公對曰臣聞之天子

金史卷八十一
卷八十一
無戲言言則史書之工誦之士稱之於是遂封唐叔虞
于晉周公且可謂善說矣一稱而成王益重言明愛弟
之義有輔王室之固

柳宗元辨 古之傳者有言成王以桐葉與小弱弟戲
曰以封汝周公入賀王曰戲也周公曰天子不可戲乃
封小弱弟於唐吾意不然王之弟當封耶周公宜以時
言於王不待其戲而賀以成之也不當封耶周公乃成
其不中之戲以地以人與小弱弟者為之主其得為聖

乎且周公以王之言不可苟焉而已必從而成之也設有不幸王以桐葉戲婦寺亦得舉而從之乎凡王者之德在行之何若設未得其當雖十易之不為病要於其當不可使易也而況以其戲乎若戲而必行之是周公教王遂過也吾意周公輔成王宜以道從容優樂要之歸大中而已必不逢其失而為之辭又不當束縛之馳驟之使若牛馬然急則敗矣且家人父子尚不能以此自克況號為君臣者耶是特小丈夫缺缺者之事非周

公所宜用故不可信或曰封唐史佚成之

晉惠王之二十四年晉始亂故封桓叔于曲沃靖侯之
孫欒賓傳之師服曰吾聞國家之立也本大而末小是
以能固故天子建國諸侯立家卿置側室大夫有貳宗
士有隸子弟庶人工商各有分親皆有等衰是以民服
事其上而下無覬覦今晉甸侯也而建國本既弱矣其
能久乎

辛櫟見魯穆公曰周公不如太公之賢也穆公曰子何

以言之辛櫟對曰周公擇地而封曲阜太公擇地而封營丘爵土等其地不若營丘之美人民不如營丘之衆不徒若是營丘又有天固穆公心慙不能應也辛櫟趨而出南宮邊子入穆公具以辛櫟之言語南宮邊子南宮邊子曰昔周成王之卜居成周也其命龜曰予一人兼有天下辟就百姓敢無中土乎使予有罪則四方伐之無難得也周公卜居曲阜其命龜曰作邑乎山之陽賢則茂昌不賢則速亡季孫行父之戒其子也曰吾欲

室之俠于兩社之間也使吾後世有不能事上者使其替之益速如是則曰賢則茂昌不賢則速亡安在擇地而封哉或示有天固也辛櫟之言小人也子無復道也鄭桓公東會封于鄭暮舍于宋東之逆旅逆旅之史從外來曰客將焉之曰會封于鄭逆旅之史曰吾聞之時難得而易失也今客之寢安殆非封也鄭桓公聞之援轡自駕其僕接淅而載之行十日夜而至釐何與之爭封故以鄭桓公之賢微逆旅之史幾不會封也

虞卿謂春申居曰臣聞之春秋於安思危危則慮安今
楚王春秋高矣而君之封地不可不早定也為主君慮
封者莫如遠楚秦孝公封商君孝公死而後主不免殺
之秦惠王封冉子惠王死而後王奪之公孫鞅功臣也
冉子親姻也然而不免奪死者封近故也太公望封於
齊邵公奭封於燕為其遠王室矣今燕之罪大而趙怨
深故君不如北兵以德趙踐亂燕以定身封此百代之
一時也君曰所道攻燕非齊則魏魏齊新怨楚楚軍雖

欲攻燕將道何哉對曰請令魏王可君曰何如對曰臣請到魏而使所以信之廼謂魏王曰夫楚亦强大矣天下無敵乃且攻燕魏王曰鄉也子云天下無敵今也子云乃且攻燕者何也對曰今謂馬多力則有矣若曰勝千鈞則不然者何也夫千鈞非馬之任也今謂楚强大則有矣若越趙魏而鬪兵於燕則豈楚之任也哉非楚之任而楚為之是倣楚也倣楚是强魏也其於王孰便也

秦丞相王綰等言諸侯初破燕齊荆地遠不為置王毋以填之請立諸子唯上幸許始皇下其議於羣臣羣臣皆以為便廷尉李斯議曰周文武所封子弟同姓甚衆然後屬疏遠相攻擊如仇讐諸侯更相誅伐周天子弗能禁止今海內賴陛下神靈一統皆為郡縣諸子功臣以公賦稅重賞賜之甚足易制天下無異意則安寧之術也置諸侯不便始皇曰天下共苦戰鬪不休以有侯王賴宗廟天下初定又復立國是樹兵也而求其寧息

豈不難哉廷尉議是分天下以為三十六郡

李翰漢祖呂后五等論 或稱漢祖建五等封異姓其

計得乎高后立四王非劉氏其事順乎嘗試論之曰夫
思治惡亂體國之常理去危就安宅生之大域然而制
業圖遠隨化會機是非較於毫釐得失差於興滅可不
謂然乎揆夫高祖造漢殷鑒亡秦宗族無尺寸之封子
弟立虛空之地故衆枝莫助而孤根易拔封建之心肇
於此矣又謂大業可以力取神器推於命歸思得包四

海以獨富舉百郡以從欲而外誘異端內疑成計及見
羣心交阻偶語間興適悟天下不可獨理專欲不能益
衆分利推恩乃先封雍齒然後將士歛手不懷反覆豪
俊息慮知難於動五等之制於是行焉既而鸞輅龍旂
皆王室昭穆黼衣朱黻即功臣子孫君利世祚人安定
主上敦子愛之情下結體信之志羣后因犬牙之勢匹
夫絕烏合之舉此所以為計之是也何創五等之議不
遵三代之典境土踰溢隄防漏下權敵上都制方偶國

過當啓陵僭之端怙強連交爭之兆賈誼痛其將亂鼂
錯憂其必危卒使諸侯失節朝廷忿忌此所以為計之
非也且夫中興之主不讓肇基之勲成務之臣有高佐
命之力故禮樂大備取惟新之格言琴瑟不調除仍舊
之弊法觀乎孝惠既崩高后稱制侯王諸呂何不可哉
當若卑署祿產之位宜序親疎之節小其國以圖全薄
其勢以遠害而陳平周勃亦分茅錫土將相之後誓同
山河舅甥之國穆若唇齒預閉覬覦之心不踐嫵猜之

路克復明辟決自我躬高謝壽陵無負先帝安有齊兵
之觀變代邸之危疑哉此所以為計之得也神害久盈
物無兩大以呂氏之盛跨漢朝之權專禁兵以候疑秉
大政以速謗趨趨異姓蓄姦候隙刺促大臣側目相視
自投機穽實履憂虞此所以為計之失也嗚呼物有益
之而損損之而益凡人臨事多惑視往則明向使高祖
呂后觀既往之勢析當時之疑斷必然之策杜未萌之
禍則惠丈之間無劉呂之難哀平之末有晉鄭是依況

復周陳諸家休戚連漢黎獻思德謳歌未改雖天命興廢孰能明之然人謨協密必無悔矣

司馬遷漢興以來諸侯年表論 殷以前尚矣周封五等公侯伯子男然封伯禽康叔於魯衛地各四百里親親之義褒有德也太公於齊兼五侯地尊勤勞也武王成康所封數百而同姓五十五地上不過百里下三十里以輔衛王室管蔡康叔曹鄭或過或損幽厲之後王室缺侯伯疆國興焉天子微弗能正非德不足形勢弱

也漢興序二等高祖末年非劉氏而王者若無功上所
不置而侯者天下共誅之高祖子弟同姓為王者九國
唯獨長沙異姓而功臣侯者百餘人自鴈門太原以東
至遼陽為燕代國常山以南太行左轉度河濟阿甄以
東薄海為齊趙國自陳以西南至九疑東帶江淮穀泗
薄會稽為梁楚吳淮南長沙國皆外接於胡越而內地
北距山以東盡諸侯地大者或五六郡連城數十置百
官宮觀僭於天子漢獨有三河東郡潁川南陽自江陵

以西至蜀北自雲中至隴西與內史凡十五郡而公主
列侯頗食邑其中何者天下初定骨肉同姓少故廣彊
庶孽以鎮撫四海用承衛天子也漢定百年之間親屬
益疎諸侯或驕奢怵邪臣計謀為淫亂大者叛逆小者
不軌于法以危其命殞身亡國天子觀於上古然後加
惠使諸侯得推恩分子弟國邑故齊分為七趙分為六
梁分為五淮南分三及天子支庶子為王王子支庶為
侯百有餘焉吳楚時前後諸侯或以適削地是以燕代

無北邊郡吳淮南長沙無南邊郡齊趙梁楚支郡名山
陂海咸納於漢諸侯稍微大國不過十餘城小侯不過
數十里上足以奉貢職下足以供養祭祀以蕃輔京師
而漢郡八九十形錯諸侯間犬牙相臨秉其阨塞地利
彊本幹弱枝葉之勢也尊卑明而萬事各得其所矣臣
遷謹記高祖以來至太初諸侯譜其下益損之時今後
世得覽形勢雖彊要之以仁義為本

三王世家 大司馬臣去病昧死再拜上疏皇帝陛下

陛下過聽使臣去病待罪行間宜專邊塞之思慮暴骸
中野無以報乃敢惟他議以干用事者誠見陛下憂勞
天下哀憐百姓以自忘虧膳貶樂損郎員皇子賴天能
勝衣趨拜至今無號位師傅官陛下恭讓不恤羣臣私
望不敢越職而言臣竊不勝犬馬心願陛下詔有司因
盛夏吉時定皇子位唯陛下幸察臣去病昧死再拜以
聞皇帝陛下三月乙亥御史臣光守尚書令奏未央宮
制曰下御史六年三月戊申朔乙亥御史臣光守尚書

令臣非下御史書到言丞相臣青翟御史大夫臣湯太
常臣充大行令臣息太子少傅臣安行宗正事昧死上
言大司馬去病上疏曰陛下過聽使臣去病待罪行間
宜專邊塞之思慮暴骸中野無以報乃敢惟他議以干
用事者誠見陛下憂勞天下哀憐百姓以自忘虧膳貶
樂損郎員皇子賴天能勝衣趨拜至今無號位師傅官
陛下恭讓不恤羣臣私望不敢越職而言臣竊不勝犬
馬心昧死願陛下詔有司因盛夏吉時定皇子位唯願

陛下幸察制曰下御史臣謹與中二千石二千石臣賀
等議古者裂地立國並建諸侯以承天子所以尊宗廟
重社稷也今臣去病上疏不忘其職因以宣恩乃道天
子卑讓自貶以勞天下慮皇子未有號位臣青翟臣湯
等宜奉義遵職愚僮而不逮事方今盛夏吉時臣青翟
臣湯等昧死請立皇子臣閔臣旦臣胥為諸侯王昧死
請所立國名制曰益聞周封八百姬姓並列或子男附
庸禮支子不祭云並建諸侯所以重社稷朕無聞焉且

天非為君生民也朕之不德海內未洽乃以未教成者
彊君連城即股肱何勸其更議以列侯家之三月丙子
奏未央宮丞相臣青翟御史大夫臣湯等昧死言臣謹
與列侯臣嬰齊中二千石臣賀諫大夫博士臣安等謹
議曰伏聞周封八百姬姓並列奉承天子康叔以祖考
顯而伯禽以周公立咸為建國諸侯以相傳為輔百官
奉憲各遵其職而國統備矣竊以為並建諸侯所以重
社稷者四海諸侯各以其職奉貢祭支子不得奉祭宗

祖禮也封建使守藩國帝王所以扶德施化陛下奉承
天統明開聖緒尊賢顯功興滅繼絕續蕭文終之後于
鄴褒厲羣臣平津侯等昭六親之序明天施之屬使諸
侯王封君得推私恩分子弟戶邑錫號尊建百有餘國
而家皇子為列侯則尊卑相踰列位失序不可以垂統
于萬世臣請立臣闕臣且臣胥為諸侯王三月丙子奏
未央宮制曰康叔親屬有十而獨尊者褒有德也周公
祭天命郊故魯有白牡駢剛之牲羣公不毛賢不肖差

也高山仰之景行嚮之朕甚慕焉所以抑未成家以列
侯可四月戊寅奏未央宮丞相臣青翟御史大夫臣湯
昧死言臣青翟與列侯吏二千石諫大夫博士臣慶等
議昧死奏請立皇子為諸侯王制曰康叔親屬有十而
獨尊者褒有德也周公祭天命郊故魯有白牡駢剛之
牲羣公不毛賢不肖差也高山仰之景行嚮之朕甚慕
焉所以抑未成家以列侯可臣青翟臣湯博士臣將行
等伏聞康叔親屬有十武王繼體周公輔成王其八人

皆以祖考之尊建為大國康叔之年幼周公在三公之位而伯禽據國于魯蓋爵命之時未至成人康叔後扞祿父之難伯禽殄淮夷之亂昔五帝異制周爵五等春秋三等皆因時而序尊卑高皇帝撥亂世反諸正昭至德定海內封建諸侯爵位二等皇子或在襁褓而立為諸侯王奉承天子為萬世法則不可易陛下躬親仁義體行聖德表裏文武顯慈孝之行廣賢能之路內褒有德外討疆暴極臨北海西湊月氏匈奴西域舉國奉師

輿械之費不賦于民虛御府之藏以賞元戎開禁倉以賑貧窮減戍卒之半百蠻之君靡不嚮風承流稱意遠方殊俗重譯而朝澤及外方故珍獸至嘉穀興天應甚彰今諸侯妻子封至諸侯王而家皇子為列侯臣青翟臣湯等竊伏熟計之皆以為尊卑失序使天下失望不可臣請立臣閔臣且臣胥為諸侯王四月癸未奏未央宮留中不下丞相臣青翟太僕臣賀行御史大夫事太常臣克太子少傅臣安行宗正事昧死言臣青翟等前

奏大司馬臣去病上疏言皇子未有號位臣謹與御史大夫臣湯中二千石二千石諫大夫博士臣慶等昧死請立皇子臣閔等為諸侯王陛下謙讓文武躬自切及皇子未教羣臣之議儒者稱其術或諄其心陛下固辭弗許家皇子為列侯臣青翟等竊與列侯臣壽成等二十七人議皆曰以為尊卑失序高皇帝建天下為漢太祖王子孫廣支輔先帝法則弗改所以宣至尊也臣請令史官擇吉日具禮儀上御史奏輿地圖他皆如前故

事制曰可四月丙申奏未央宮太僕臣賀行御史大夫
事昧死言太常臣充言卜入四月二十八日乙巳可立
諸侯王臣昧死奏輿地圖請所立國名禮儀別奏臣昧
死請制曰立皇子闕為齊王且為燕王胥為廣陵王四
月丁酉奏未央宮六年四月戊寅朔癸卯御史大夫湯
下丞相丞相下中二千石二千石下郡太守諸侯相丞
書從事下當用者如律令維六年四月乙巳皇帝使御
史大夫湯廟立子闕為齊王策曰於戲小子闕受茲青

社朕承祖考維稽古建爾國家封于東土世為漢藩輔
於戲念哉恭朕之詔惟命不于常人之好德克明顯光
義之不圖俾君子怠悉爾心允執其中天祿永終厥有
憊不臧乃凶于而國害于爾躬於戲保國艾民可不敬
與王其戒之 立子且為燕王策曰於戲小子且受茲
立社朕承祖考維稽古建爾國家封于北土世為漢藩
輔於戲葷粥氏虐老獸心侵犯寇盜加以奸巧邊萌於
戲朕命將率徂征厥罪萬夫長千夫長三十有二君皆

來降旗奔師葷粥徙域北州以綏悉爾心毋作怨毋俾
德毋乃廢備非教士不得從徵於戲保國艾民可不敬
與王其戒之 立子胥為廣陵王策曰於戲小子胥受
茲赤社朕承祖考維稽古建爾國家封于南土世為漢
藩輔古人有言大江之南五湖之間其人輕心揚州保
彊三代要服不及以政於戲悉爾心戰戰兢兢乃惠乃
順毋侗好佚毋適宵人維法維則書云臣不作威不作
福靡有后羞於戲保國艾民可不敬與王其戒之 太

史公曰古人有言曰愛之欲其富親之欲其貴故王者疆土建國封立子弟所以褒親親序骨肉尊先祖貴支體廣同姓于天下也是以形勢彊而王室安自古至今所由來久矣非有異也故弗論著也燕齊之事無足采者然封立三王天子恭讓羣臣守義文辭爛然甚可觀也是以附之世家

賈誼請封建子弟疏 陛下即不定制如今之勢不過一傳再傳諸侯猶且人恣而不制豪植而大彊漢法不

得行矣陛下所以為藩扞及皇太子之所恃者唯淮陽
代二國耳代北邊匈奴與彊敵為鄰能自完則足矣而
淮陽之比大諸侯屢如黑子之著面適足以餌大國耳
不足以有所禁禦方今制在陛下制國而令子適足以
為餌豈可謂工哉人主之行異布衣布衣者飾小行競
小廉以自託於鄉黨人主唯天下安社稷固不耳高皇
帝瓜分天下以王功臣反者如蝟毛而起以為不可故
斬去不義諸侯而虛其國擇良日立諸子雒陽上東門

之外畢以為王而天下安故大人者不牽小行以成大
功今淮南地遠者或數千里越兩諸侯而縣屬於漢其
吏民繇役往來長安者自悉而補中道衣服錢用諸費
稱此其苦屬漢而欲得王至甚逋逃而歸諸侯者已不
少矣其勢不可久臣之愚計願舉淮南地以益淮陽而
為梁王立後割淮陽北邊二三列城與東郡以益梁不
可者可徙代王而都睢陽梁起於新鄴以北著之河淮
陽包陳以南捷之江則大諸侯之有異心者破膽而不

敢謀梁足以扞齊趙淮陽足以禁吳楚陛下高枕終亡
山東之憂矣此二世之利也當今恬然適遇諸侯之皆
少數歲之後陛下且見之矣夫秦日夜苦心勞力以除
六國之禍今陛下力制天下顧指如意高拱以成六國
之禍難以言智苟身亾事畜亂宿禍孰視而不定萬年
之後傳之老母弱子將使不寧不可謂仁臣聞聖主言
問其臣而不自造事故使人臣得畢其愚忠唯陛下裁
幸

諫復封淮南四子疏 竊恐陛下接王淮南諸子曾不與如臣者孰計之也淮南王之悖逆無道天下孰不知其罪陛下幸而赦遷之自疾而死天下孰以王死之不當今奉尊罪人之子適足以負謗於天下耳此人少壯豈能忘其父哉白公勝所為父報仇者大父與伯父叔父也白公為亂非欲取國代主也發忿快志剡手以衝仇人之胷固為俱靡而已淮南雖小黥布嘗用之矣漢存特幸耳夫擅仇人足以危漢之資於策不便雖割而

為四子一心也子之衆積之財此非有子胥白公報於廣都之中即疑有專諸荆軻起於兩柱之間所謂假賊兵為虎翼者也願陛下少留計

大都篇 昔楚靈王問范無宇曰我欲大城陳蔡葉與不羹賦車各千乘焉亦足以當晉矣又加之以楚諸侯其來朝乎范無宇曰不可臣聞大都疑國大臣疑主亂之媒也都疑則交爭臣疑則並令禍之深者也今大城陳蔡葉與不羹或不克不足以威晉若克之以資財實

之以重祿之臣是輕本而重末也臣聞尾大不掉末大必折此豈不施威諸侯之心哉然終為楚國大患者必此四城也靈王弗聽果城陳蔡葉與不羹實之以兵車克之以大臣是歲也諸侯果朝居數年陳蔡葉與不羹或奉公子棄疾內作難楚國雲亂王遂死於乾溪于守亥之井為計若此豈不痛也哉悲夫本細末大弛心必至時乎時乎可痛惜者此也天下之勢方病大虺一脛之大幾如要一指之大幾如股臣聞尾大不掉末大必

折惡病也平居不可屈信一二指愒身固無聊也失今弗治必為痼疾後雖有扁鵲弗能為已此所以竊為陛下患也病非徒癘也又苦蹶蓋元王之子帝之從弟也今之王者從弟之子也惠王親兄之子也今之王者兄子之子也親者或無分地以安天下疏者或專大權以偏天子故曰非徒病癘也又苦蹶蓋也可痛哭者此病是也

等齊篇 諸侯王所在之宮衛織履蹲夷以皇帝在所

官法論之郎中謁者受臈取告以官皇帝之法子之事諸侯王或不廉潔平端以事皇帝之法罪之曰一用漢事諸侯王乃事皇帝也推是則諸侯之王乃將至尊也然則天子之與諸侯臣之與下宜撰然齊等若是乎天子之相號為丞相黃金之印諸侯之相號為丞相黃金之印而尊無異等秩加二千石之上天子列御秩二千石諸侯列御秩二千石則臣已同矣人主登臣而尊今臣既同則法惡得不齊天子衛御號為大僕銀印秩二

千石諸侯之御號曰大僕銀印秩二千石則御已齊矣
御既已齊則車飾具惡得不齊天子親號云太后諸侯
親號云太后天子妃號曰后諸侯妃號曰后然則諸侯何
損而天子何加焉妻既已同則夫何以異天子宫門曰
司馬闌入者為城且諸侯宮門曰司馬闌入者為城且
殿門俱為殿門闌入之罪亦俱棄市宮墻門衛同名其
嚴一等罪已鈞矣天子之言曰令令甲令乙是也諸侯
之言曰令令儀之言是也天下卑號皆稱陛下諸侯卑

號稱陛下天子車曰乘輿諸侯車曰乘輿乘輿等也衣被次齊貢死經緯也苟工巧而志欲之唯冒上軼主次也然則所謂主者安居臣者安在人之情不異面目狀貌同類貴賤之別非人人天根著於形容也所持以別貴賤明尊卑者等級勢力衣服號令也亂且不息滑曼無紀天理則同人事無別然則所謂臣主者非有相臨之具尊卑之經也特面形而膚之耳近習乎晝近貌然後能識則疏遠無所放衆庶無以期則下惡能不疑其

上君臣同倫異等同服則上惡能不眩於其下孔子曰
長民者衣服不貳從容有常以齊其民則民德一詩云
彼都人士狐裘黃裳行歸于周萬民之望孔子曰為上
可望而知也為下可述而志也則君不疑於其臣而臣
不惑於其君而此之不行沐瀆無界可謂長太息者此
也

鼂錯為太子家令得幸太子數從容言吳過可削數上
書說孝文帝文帝覽不忍罰以此吳日益橫及孝景帝

即位錯為御史大夫說上曰昔高祖初定天下昆弟少
諸子弱大封同姓故王孽子悼惠王王齊七十餘城庶
弟元王王楚四十餘城兄子漢王吳五十餘城封三庶
孽分天下半今吳王前有太子之郤詐稱病不朝于古
法當誅文帝弗忍因賜几杖德至厚宜改過自新乃益
驕溢即山鑄錢煮海水為鹽誘天下小人謀作亂今削
之亦反不削之亦反削之其反亟禍小不削反遲禍大
梁孝王使人殺故吳相袁盎景帝召田叔案梁具得其

事還報景帝曰死罪有之上曰其事安在田叔曰上毋以梁事為也上曰何也曰今梁王不伏誅是漢法不行也如其伏法而太后食不甘味卧不安席此憂在陛下也景帝大賢之以為魯相 褚先生梁孝王傳論曰臣為郎時聞之于宮殿中老郎吏好事之者稱道之也竊以為今梁孝王怨望欲為不善者事從中生今太后女主也以愛少子故欲令梁王為太子大臣不時正言其不可狀阿意治小私說意以受賞賜非忠臣也齊如魏

其戾竇嬰之正言也何以有後禍景帝與王燕見侍太后飲景帝曰千秋萬歲之後傳王太后喜說竇嬰在前據地言曰漢法之約傳子適孫今帝何以得傳其弟擅亂高帝約乎于是景帝默然無聲太后意不悅故成王與小弱弟立樹下取一桐葉以與之曰吾用封汝周公聞之進見曰天王封弟甚善成王曰吾直與戲耳周公曰人主無過舉不當有戲言言之必行之于是乃封小第以應縣是後成王沒齒不敢有戲言言必行之孝經

曰非法不言非道不行此聖人之法言也今主上不宜
出好言于梁王梁王上有太后之重驕蹇日久數聞景
帝好言千秋萬世之後傳王而實不行又諸侯王朝見
天子漢法凡當四見耳始到入小見到正月朔旦奉皮
薦璧玉賀正月法見後三日為王置酒賜金錢財物後
二日復入小見辭去凡留長安不過二十日小見者燕
見于禁門內飲于省中非士人所得入也今梁王西朝
因留且半歲入與人主同輦出與同車示風以大言而

實不與令出怨言謀叛逆乃隨而憂之不亦遠乎非大
賢人不知退讓今漢之儀法朝見賀正月者常一王與
四侯俱朝見十餘歲一至今梁王常比年入朝見久留
鄙語曰驕子不孝非惡言也故諸侯王當為置良師傅
相忠言之士如汲黯韓長孺等敢直言極諫安得有患
害蓋聞梁王西入朝謁竇太后燕見與景帝俱侍坐于
太后前言語私說太后謂帝曰吾聞殷道親親周道尊
尊其義一也安車大駕用梁孝王為寄景帝跪席舉身

曰諾罷酒出帝名袁盎諸大臣通經術者曰太后言如
是何謂也皆對曰太后意欲立梁王為帝太子帝問其
狀袁盎對曰殷道親親者立弟周道尊尊者立子殷道
質質者法天親其所親故立弟周道文文者法地尊者
敬也敬其本始故立長子周道太子死立適孫殷道太
子死立其弟帝曰於公何如皆對曰方今漢家法周周
道不得立弟當立子故春秋所以非宋宣公宋宣公不
立子而與弟弟受國死復反之與兄之子弟之子爭之

以為我當代父後即刺殺兒子以故國亂禍不絕故春秋曰君子大居正宋之禍宣公為之臣請見太后白之袁盎等入見太后太后言欲立梁王梁王即終欲誰立太后曰吾復立帝子袁盎等以宋宣公不立正生禍禍亂後五世不絕小不忍害大義狀報太后太后乃解說即使梁王歸就國而梁王聞其議出于袁盎諸大臣所怨望使人來殺袁盎袁盎顧之曰我所謂袁將軍者也公得毋誤乎刺者曰是矣刺之

主父偃說武帝曰古者諸侯地不過百里疆弱之形易制今諸侯或連城數十地方千里緩則驕奢易為淫亂急則阻其疆而合從以逆京師今以法割削則逆節萌起前日晁錯是也今諸侯子弟或十數而適嗣代立餘雖骨肉無尺地之封則仁孝之道不宣願陛下令諸侯得推恩分子弟以地侯之彼人人喜得所願上以德施實分其國必稍自銷弱矣於是上從其計

元帝敕東平王傅相

夫人之性皆有五常及其少長

耳目率于嗜欲故五常銷而邪心作情亂其性利勝其義而不失厥家者未之有也今王富于春秋氣力武勇獲師傅之教淺加以少所聞見自今以來非五經之正術敢以游獵非禮道王者輒以名聞

成帝時梁王立淫亂谷永上疏 臣聞禮天子外屏不欲見外也是故帝王之意不窺人閨門之私聽聞中黃之言春秋為親者諱詩云戚戚兄弟莫遠具邇今梁王年少頗有狂病始以惡言按驗既亾事實而發閨門之

私非本章所指王辭又不服猥強効力傳致難明之事
獨以偏辭成臬斷獄亾益于治道汙鱗宗室以內亂之
惡披布宣揚于天下非所以為公族隱諱增朝廷之榮
華昭聖德之風化也臣愚以為王少而父同產長年齒
不倫梁國之富足以厚聘美女招致妖麗父同產亦有
耻辱之心案事者乃驗問惡言何故猥自發舒以三者
揆之殆非人情疑有所迫切過誤失言文吏躡尋不得
轉移萌芽之時加恩勿治上也既已案驗舉憲宜及王

辭不服詔廷尉選上德通理之吏更審考清問著不然之效定失誤之法而反命于下吏以廣公族附疏之德為宗室刷汙亂之耻甚得治親之誼天子由是寢而不治

北海王睦少好學博通書傳光武愛之數被延納顯宗之在東宮尤見幸待入侍諷誦出則執轡中興初禁網尚濶而睦性謙恭好士千里交結自名儒宿德莫不造門由是聲價益廣永平中法憲頗峻睦乃謝絕賓客放

心音樂然性好讀書常為愛翫歲終遣中大夫奉璧朝
賀召而謂之曰朝廷設問寡人大夫將何辭以對使者
曰大王忠孝慈仁敬賢樂士臣雖螻蟻敢不以實睦曰
吁此危我哉此乃孤幼時進趣之行也大夫其對以孤
襲爵以來志意衰惰聲色是娛犬馬是好使者受命而
行其能屈申若此

廣陵思王荆建武十五年封山陽公十七年進爵為王
荆性刻急隱害有才能而喜文法光武崩大行在前殿

荆哭不哀而作飛書封以方底令蒼頭詐稱東海王彊
舅大鴻臚郭況書與彊曰君王無罪猥被斥廢而兄弟
至有束縛入牢獄者太后失職別守北宮及至年老遠
斥居邊海內深痛觀者鼻酸及太后尸柩在堂洛陽吏
以次捕斬賓客至有一家三尸伏堂者痛甚矣今天下
有喪弓弩張設甚備間梁松勅虎賁史曰吏以便宜見
非勿有所拘封侯難再得也郎官竊悲之為王寒心累
息今天下爭欲思刻賊王以求功寧有量邪若歸弁二

國之衆可聚百萬君王為之主鼓行無前功易于太山破
鷄子輕于四馬載鴻毛此湯武兵也今年軒轅星有白
氣星家及喜事者皆云白氣者喪軒轅女主之位又太
白前出西方至午兵當起又太子星色黑至辰日輒變
赤夫黑為病赤為兵弩力卒事高祖起亭長陛下興白
水何況于王陛下長子故副主哉上以求天下事必舉
下以雪除沉沒之耻報死母之讐精誠所加金石為開
當為秋霜無為檻羊雖欲為檻羊又可得乎竊見諸相

工言王貴天子法也人主崩亡閭閻之伍尚為盜賊欲有所望何況王邪夫受命之君天之所立不可謀也今新帝人之所置彊者為右願君王為高祖陛下所志無為扶蘇將閭叫呼天也彊得書惶怖即執其使封書上之顯宗以荆毋弟祕其事遣荆出止河南宮時西羌反荆不得志冀天下因羌驚動有變私迎能為星者與謀議帝聞之乃徙封荆廣陵王遣之國其後荆復呼相工謂曰我貌類先帝先帝三十得天下我今亦三十可起

兵未相者詣吏告之荆惶恐自繫獄帝復加恩不考極其事下詔不得臣屬吏人唯食租如故使相中尉謹宿衛之荆猶不改其後使巫祭祀祝詛有司舉奏請誅之

荆自殺

東平王蒼上疏求朝章帝許之特賜裝錢千五百萬其餘諸王各千萬帝以蒼冒涉寒露遣謁者賜貂裘及大官食物珍果使大鴻臚竇固持節郊迎帝乃親自循行邸第豫設帷床其錢帛器物無不克備下詔曰禮云伯

父歸寧乃國詩云叔父建爾元子敬之至也昔蕭相國
加以不名優忠賢也況兼親尊者乎其沛濟南東平中
山四王讚皆勿名蒼既至升殿乃拜天子親答之其後
諸王入宮輒以輦迎至省閣乃下蒼以受恩過禮情不
自寧上疏辭曰臣聞貴有常尊賤有等威卑高列序上
下以理陛下至德廣施慈愛骨肉既賜奉朝請咫尺天
儀而親屈至尊降禮下臣每賜讌見輒興席改容中宮
親拜事過典故臣惶怖戰慄誠不自安每會見踧躅無

所措置此非所以章示羣下安臣子也帝省奏嘆息愈
褒貴焉舊典諸王女皆封鄉主乃獨封蒼五女為縣公
主三月大鴻臚奏遣諸王歸國帝特留蒼賜以祕書列
僊圖道術祕方至八月飲酎畢有司復奏遣蒼乃許之
手詔賜蒼曰骨肉天性誠不以遠近為親疎然數見顏
色情重昔時念王久勞思得還休欲署大鴻臚奏不忍
下筆顧授小黃門中心戀戀惻然不能言于是車馬祖
送流涕而訣復賜乘輿服御珍寶輿馬錢布以億萬計

宋意上章帝疏 陛下至孝烝烝恩愛隆深以濟南王
康中山王焉先帝昆弟特蒙禮寵聖情戀戀不忍遠離
比年朝見久留京師崇以叔父之尊同之家人之禮車
入殿門即席不拜分甘損膳賞賜優渥昔周公懷聖人
之德有致太平之功然後王曰叔父加以賜幣今康焉
夫庶享食大國陛下即位蠲除前過還所削黜行食它
縣男女少長並受爵邑恩寵踰制禮敬過度春秋之義
諸父昆弟無所不臣所以尊尊卑卑幹強弱枝者也陛下

下德業隆盛當為萬世典法不宜以私恩損上下之序
失君臣之正又西平王羨等六王皆妻子成家官屬備
具當早就蕃國為子孫基址而室第相望久槃京邑婚
姻之盛過於本朝僕馬之衆充塞城郭驕侈僭擬寵祿
隆過今諸國之封並皆膏腴風氣平調道路夷近朝聘
有期行來不難宜割情不忍以義斷恩發遣康焉各歸
蕃國令羨等速就便時以塞衆望

何敞諫濟南安王康疏 蓋聞諸侯之義制節謹度然

後能保其社稷和其民人大王以骨肉之親享食茅土
當施張正令明其典法出入進止宜有期度輿馬臺隸
應為科品而今奴婢廐馬皆有千餘增無用之口以自
蠶食宮婢閉隔失其天性感亂和氣又多起內第觸犯
防禁費以百萬而功猶未半夫文繁者質荒木勝者人
亾皆非所以奉禮承上傳福無窮者也故楚作章華以
凶吳興姑蘇而滅景公千駟民無稱焉今數遊諸第晨
夜無節又非所以遠防未然臨深履薄之法也願大王

修恭儉遵古制省奴婢之口減乘馬之數斥私田之富
節遊觀之宴以禮起居則故乃敢安心自保惟大王深
慮愚言

史弼上桓帝封事 臣聞帝王之於親戚愛雖隆必示
之以威體雖貴必禁之以度如是和睦之道興骨肉之
恩遂昔周襄王恣甘昭公孝景皇帝驕梁孝王二弟階
寵終用教慢卒周有播蕩之禍漢有爰盎之變竊聞渤
海王悝憑至親之屬恃偏私之愛失奉上之節有僭慢

之心外聚剽輕不逞之徒內荒酒樂出入無常所與羣
居皆有口無行或家之棄子或朝之斥臣必有羊勝伍
被之變州司不敢彈糾傅相不能匡輔陛下隆於反于
不忍遏絕恐遂滋蔓為害彌大乞露臣奏宣示百僚使
臣得於清朝明言其失然後詔公卿平處其法法決罪
定乃下不忍之詔臣下固執然後少有所許如是則聖
朝無傷親之譏渤海有享國之慶不然懼大獄將興使
者相望於路矣臣職典禁兵備禦非常而妄加藩國干

犯至戚罪不容誅不勝憤懣謹冒死以聞

魏曹同六代論 昔夏殷周歷世數十而秦二世而亡

何則三代之君與天下共其民故天下同其憂秦王獨
制其民故傾危而莫救夫與人共其樂者人必憂其憂
與人同其安者人必拯其危先王知獨治之不能久也
故與人共治之知獨守之不能固也故與人共守之兼
親疎而兩用參同異而並進是以輕重相鎮親疎相衛
並兼路塞逆節不生及其衰也桓文帥禮苞茅不貢齊

師伐楚宋不城周晉戮其宰王綱弛而復張諸侯傲而復肅二霸之後浸以陵遲吳楚憑江負固方城雖心希九鼎而畏迫宗姬姦情散於胷懷逆謀消於唇吻斯豈非信重親戚任用賢能枝葉碩茂本根賴之與自此之後轉相攻伐吳并於越晉分為三魯滅於楚鄭魚於韓暨乎戰國諸姬微矣唯燕衛獨存然皆弱小西迫彊秦南畏齊楚救於滅亡匪遑相恤至於王赧降為庶人猶枝幹相持得居虛位海內無主四十餘年秦據勢勝之

地馳謫詐之術征伐闕東蠶食九國至於始皇乃定天
位曠日若彼用力若此豈非深根固蒂不拔之道乎易
曰其亾其亾繫于苞桑周德其當之矣秦觀周之弊以
為小弱見奪於是廢五等之爵立郡縣之官棄禮樂之
教任苛刻之政子弟無尺寸之封功臣無立錐之土內
無宗子以自毗輔外無諸侯以為蕃衛仁心不加於親
戚惠澤不流於枝葉譬猶艾刈股肱獨任胷腹浮舟江
海捐棄楫擢觀者為之寒心而始皇宴然自以為關中

之固金城千里子孫帝王萬世之業也豈不悖哉是時
淳于越諫曰臣聞殷周之王封子弟功臣千有餘人今
陛下君有海內而子弟為匹夫卒有田常六卿之臣而
無輔弼何以相救事不師古而能長久者非所聞也始
皇聽李斯偏說而黜其義至於身死之日無所寄付委
天下之重於凡夫之手託廢立之命於奸臣之口至今
趙高之徒誅鋤宗室胡亥少習刻薄之教長遵凶父之
業不能改制易法寵任兄弟而乃師謨申商諮謀趙高

自幽深宮委政讒賊身殘望夷求為黔首豈可得哉遂
乃郡國離心衆庶潰叛勝廣倡之於前劉項斃之於後
向使始皇納淳于之策抑李斯之論割裂州國分王子
弟封三代之後報功臣之勞士有常君民有定主枝葉
相扶首尾為用雖使子孫有失道之行時人無湯武之
賢奸謀未發而身已屠戮何區區之陳項而復得措其
手足哉故漢祖奮三尺之劍驅烏集之衆五年之中而
成帝業自開闢以來其興功立勲未有若漢祖之易者

也夫伐深根者難為功摧枯朽者易為力理勢然也漢鑿秦之失封植子弟及諸呂擅權圖危劉氏而天下所以不傾動百姓所以不易心者徒以諸侯疆大磐石膠固東牟朱虛授命於內齊代吳楚作衛於外故也向使高祖踵亡秦之法忽先王之制則天下已傳非劉氏有也然高祖封建地過古制大者跨州魚域小者連城數十上下無別權侔京室故有吳楚七國之患賈誼曰諸侯疆盛長亂起姦夫欲天下之治安莫若衆建諸侯而

少其力令海內之勢若身之使臂臂之使指則下無背
叛之心上無誅伐之事文帝不從至於孝景猥用晁錯
之計削黜諸侯親者怨恨疎者震怒吳楚倡謀五國從
風兆發高祖釁成文景由寬之過制急之不漸故也所
謂末大必折尾大難掉尾同於體猶或不從況乎非體
之尾其可掉哉武帝從主父之策下推恩之令自是之
後齊分為七趙分為六淮南三割梁代五分遂以陵遲
子孫微弱衣食租稅不豫政事或以酎金免削或以無

後國除至於成帝王氏擅朝劉向諫曰臣聞公族者國之枝葉葉落則本根無所庇蔭方今同姓疎遠母黨專政排擯宗室孤弱公族非所以保守社稷安固國嗣也其言深切多所稱引成帝雖悲傷歎息而不能用至于哀平異姓秉權假周公之事而為田常之亂高拱而竊天位一朝而臣四海漢宗室王侯解印釋綬貢奉社稷猶懼不得為臣妾或乃為之符命頌莽恩德豈不哀哉由斯言之非宗子獨忠孝於惠文而叛逆於哀平也徒

權輕勢弱不能有定爾賴光武皇帝挺不世之姿禽王莽於已成紹漢嗣於既絕斯豈非宗子之力邪而曾不鑒秦之失策襲周之舊制踵亡國之法而僥倖無疆之期至於桓靈閹豎執衡朝無死難之臣外無同憂之國君孤立於上臣弄權於下本末不能相御身手不能相使由是天下鼎沸姦凶並爭宗廟焚為灰燼宮室變為莽藪居九州之地而身無安處悲夫魏太祖躬聖明之資兼神武之畧耻王綱之廢絕愍漢室之傾覆龍飛譙

沛鳳翔兗豫掃除凶逆剪滅鯨鯢迎帝西京定都潁邑
漢氏奉天禪位大魏于今二十有四年矣觀五代之存
亡而不用其長策覩前車之傾覆而不改其轍迹子弟
王空虛之地君有不使之民宗室竄於閭閻不聞邦國
之政權均匹夫勢齊凡庶內無深根不拔之固外無磐
石宗盟之助非所以安社稷為萬世之業也且今之州
牧郡守古之方伯諸侯皆跨有千里之士兼軍伍之任
或比國數人或兄弟並據而宗室子弟曾無一人間廁

其間與相維持非所以彊幹弱枝備萬一之慮也今之用賢或超為名都之主或為偏師之帥而宗室有文者必限小縣之宰有武者必置百人之上使夫廉高之士畢志於衡輓之內才能之人耻與非類為伍非所以勸進賢能褒異宗族之禮也夫泉竭則流涸根朽則葉枯枝繁者蔭根條落者本孤故語曰百足之蟲至死不僵扶之者衆也此言雖小可以譬大且墉基不可倉卒而成威名不可一朝而立皆為之有漸建之有素譬之種

樹久則深固其根本茂盛其枝葉若造次徙於山林之中植於宮殿之下雖壅之以黑墳暖之以春日猶不救於枯槁何暇繁育哉夫樹猶親戚土猶士民建置不久則輕下慢上平居猶懼其離叛危急將如之何是以聖王安而不逸以慮危也存而設備以懼亡也故疾風卒至而無摧拔之憂天下有變而無傾危之患矣

曹植求通親親表 臣植聞天稱其高者以無不覆地稱其廣者以無不載日月稱其明者以無不照江海稱

其大者以無不容故孔子曰大哉堯之為君惟天為大
唯堯則之夫天德於萬物可謂弘廣矣蓋堯之為教先
親後疎自近及遠其傳曰克明峻德以親九族九族既
睦平章百姓及周文王亦崇厥化其詩曰刑于寡妻至
于兄弟以御于家邦是以雍雍穆穆風人詠之昔周公
弔管蔡之不咸廣封懿親以藩屏王室傳曰周之宗盟
異姓為後誠骨肉之恩聚而不離親親之義寔在敦固
未有義而後其君仁而遺其親者也伏惟陛下咨帝唐

欽明之德體文王翼翼之仁惠洽椒房恩昭九族羣臣
百寮番休遁上執政不廢於公朝下情得展於私室親
理之路通慶弔之情展誠可謂恕已治人推惠施恩者
矣至於臣者人道絕緒禁固明時臣竊自傷也不敢乃
望交氣類修人事叙人倫近且婚媾不通兄弟永絕吉
凶之間塞慶弔之禮廢恩紀之違甚於路人隔闕之異
殊於胡越今臣以一切之制永無朝覲之望至於注心
皇極結情紫闈神明知之矣然天實為之謂之何哉退

惟諸王常有戚戚具爾之心願陛下沛然垂詔使諸國
慶問四節得展以叙骨肉之歡恩全怡怡之篤義妃妾
之家膏沐之遺歲得再通齊義於貴宗等惠於百司如
此則古人之所歎風雅之所詠復存於聖世矣臣伏自
惟省無錐刀之用及觀陛下之所拔授若以臣為異姓
竊自料度不後於朝士矣若得辭遠遊戴武弁解朱組
佩青紱駙馬奉車趣得一號安宅京室執鞭珥筆出從
華蓋入侍輦轂承荅聖問拾遺左右乃臣丹情之至願

不離于夢想者也遠慕鹿鳴君臣之宴中詠棠棣匪他之誠下思伐木友生之義終懷蓼莪罔極之哀每四節之會塊然獨處左右唯僕隸所對唯妻子高談無所與陳發義無所與展未嘗不聞樂而拊心臨觴而歎息也臣伏以為犬馬之誠不能動人譬人之誠不能動天崩城隕霜臣初信之以臣心況徒虛語爾若葵藿之傾葉太陽雖不為迴光然向之者誠也臣竊自比葵藿若降天地之施垂三光之明者寔在陛下臣聞文子曰不為

禍始不為福先今之否隔友于同憂而臣獨倡言者竊
不願於聖世使有不蒙施之物有不蒙施之物必有慘
毒之懷故柏舟有天只之怨谷風有棄予之歎伊尹耻
其君不為堯舜孟子曰不以舜之所以事堯事其君者
不敬其君也臣之愚蔽固非虞伊至於欲使陛下崇光
被時雍之美宣緝熙章明之德者是臣悽悽之誠竊所
獨守寔懷鶴立企佇之心敢復陳聞者冀陛下儻發天
聰而垂神聽也

晉陸機五等諸侯論 夫體國營治先王所慎創制垂
基思隆後葉然而經畧不同長世異術五等之制始於
黃唐郡縣之治創自秦漢得失成敗備在典謨是以其
詳可得而言夫先王知帝業至重天下至曠曠不可以
偏制重不可以獨任任重必於借力制曠終乎因人故
設官分職所以輕其任也並建五長所以弘其制也於
是乎立其封疆之典財其親疎之宜使萬國相維以成
磐石之固宗庶雜居而定維城之業又有以見綏世之

長御識人情之大方知其為人不如厚己利物不如圖
身安上在乎悅下為己在乎利人故易曰悅以使人人
忘其勞孫卿曰不利而利之不如利而後利之之利也是
以分天下以厚樂而已得與之同憂饗天下以豐利而
我得與之共害利博則恩篤樂遠則憂深故諸侯饗食
土之實萬國受世及之祚矣夫然則南面之君各務其
治九服之民知有定主上之子愛於是乎生下之體信
於是乎結世治足以敦風道衰足以御暴故彊毅之國

不能擅一時之勢，雄俊之民無所寄，霸王之志，然後國安。由萬邦之思治，主尊，賴羣后之圖身，譬猶衆目營方，則天綱自昃，四體辭難，而心膺獲入，蓋三代所以直道。四王所以垂業也。夫盛衰隆倣，理所固有，教之廢興，繫乎其人，愿法期於必涼，明道有時，而闇故世及之制，倣於彊禦，厚下之典，漏於末折，侵弱之釁，邁自三季，陵夷之禍，終於七雄。昔者成湯親照，夏后之鑒，公旦目涉，商人之戒，文質相濟，損益有物，故五等之體不革於時，封

畛之制有隆焉爾者豈玩二王之禍而閤經世之筭乎
固知百世非可懸御善制不能無倣而侵弱之辱愈於
殄祀土崩之困痛於陵夷也是以經始權其多福慮終
取其少禍非謂侯伯無可亂之符郡縣非致治之具故
國憂賴其釋位主弱憑其翼戴及承積其倣王室遂卑
猶保名位祚垂後嗣皇統幽而不輟神器否而必存者
豈非置勢使之然歟降及亾秦棄道任術懲周之失自
矜其得尋斧始於所庇制國昧於弱下國慶獨饗其利

主憂莫與其害雖速亡趣亂不必一道顛沛之釁實由
孤立是蓋思五等之小怨忘經國之大德知陵夷之可
患閭土崩之為痛也周之不競有自來矣國乏令主十
有餘世然片言勤王諸侯必應一朝振於遠國先叛故
彊晉收其請隧之圖暴楚頓其觀鼎之志豈劉項之能
闕關勝廣之敢號澤哉借使秦人因循周制雖則無道
有與共敝而覆滅之禍豈在曩日漢矯秦枉大啓侯王
境土踰溢不遵舊典故賈生憂其危晁錯痛其亂是以

諸侯阻其國家之富憑其士民之力勢足者反疾土狹者逆遲六臣犯其弱網七子衝其漏網皇祖夷於黠徒西京病於東帝是蓋過正之災而非建侯之累也然呂氏之難朝士外顧宋昌策漢必稱諸侯逮至中葉忌其失節割削宗子有名無實天下曠然復襲亡秦之軌矣是以五侯作威不忌萬邦新都襲漢易於拾遺也光武中興纂隆皇統而猶遵覆車之遺轍養喪家之宿疾僅及數世姦宄充斥卒有彊臣專朝則天下風靡一夫從

橫則城池自夷豈不危哉在周之衰難興王室放命者
七臣干位者三子嗣王委其九鼎凶族據其天邑鉦鼙
震於閭宇鋒鏑流乎絳闕然禍止畿甸害不覃及天下
安然以治待亂是以厲宣興於共和襄惠振於晉鄭豈
若二漢階閭蹙擾而四海已沸孽臣朝入而九服夕亂
哉遠惟王莽篡逆之事近覽董卓擅權之際億兆悼心
愚智同痛然周以之存漢以之亾夫何故哉豈世乏曩
時之臣士無匡合之志歟蓋遠績屈於時異雄心挫於

卑勢耳故烈士扼腕終委寇讎之手中人變節以助虐
國之桀雖復時有鳩合同志以謀王室然上非與主下
皆市人師旅無先定之班君臣無相保之志是以義兵雲
合無救劫殺之禍民望未改而已見大漢之滅矣或以
諸侯世位不必常全昏主暴君有時比跡故五等所以
多亂今之牧守皆以官方庸能雖或失之其得固多故
郡縣易以為治夫德之休明黜陟日用長率連屬咸述
其職而淫昏之君無所容過何則其不治哉故先代有

以之興矣苟或衰陵百度自悖鬻官之吏以貨准才則貪殘之氓皆如羣后也安在其不亂哉故後王有以之廢矣且要而言之五等之君為己思治郡縣之長為利圖物何以徵之蓋企及進取仕子之常志修己安民良士之所希及夫進取之情銳而安民之譽遲是故侵百姓以利己者在位所不憚損實事以養名者官長所夙夜君無卒歲之圖臣挾一時之志五等則不然知國為己土衆皆我民民安己受其利國傷家嬰其病故前人

欲以垂後後嗣思其堂構為上無苟且之心羣下知膠
固之義使其並賢居治固功有厚薄兩愚處亂則過有
深淺然則探八代之制幾可以一理貫秦漢之典殆可
以一言蔽矣

晉書元帝明帝紀論贊 維揚作寓憑帶洪流楚江恒
戰方城對敵不得不推誠將相以總戎麾樓船萬計兵
倍王室處其利而無心者周公其人也威權外假嫌隙
內興彼有順流之師此無強藩之援商逢九亂堯止八

音明皇負圖屬在茲日運龍韜于掌握起天旆于江靡
燎其餘燼有若秋原去衰絰而踐戎場斬鯨鯢而拜園
闕鎮削威權州分江漢覆車不踐貽厥孫謀其後七十
餘年終懼敬道之害或曰興亾在運非止上流豈創制
不殊而弘之者異也贊曰傾天起害猛獸呈灾琅琊之
子仁義歸來龔行趙壁命筓荆臺雲瞻北海江望南開
晉陽禦敵河西全壤胡寇雖艱靈心弗爽三方馳驚百
蠻從響寶命還昌金輝載朗明后岐嶷軍書接要莽首

晨懸董臍昏燎厥德不回餘風可劬

八王傳論 自古帝王之臨天下也皆欲廣樹藩屏崇固維城唐虞以前憲章蓋闕夏殷以後遺跡可知然而玉帛會于塗山雖云萬國至于分疆胙土猶或未詳洎乎周室燦焉可觀封建親賢並為列國當其興也周召贊其升平及其衰也桓文輔其危亂故得卜世之祚克昌卜年之基惟永遠赧王即位天祿已終虛位無王三十餘載爰及暴秦并吞天下戒衰周之削弱忽帝業之

遠圖謂王室之陵遲由諸侯之彊大于是罷侯置守獨
尊諸己至乎子弟並為匹夫惟欲肆虐陵威莫顧謀孫
翼子枝葉微弱宗祏孤危內無社稷之臣外闕藩維之
助陳項一呼海內沸騰隕身于望夷係頸于軹道事不
師古二世而滅漢祖勃興爰革斯弊于是分王子弟列
建功臣錫之山川誓以帶礪然而矯枉過直懲羹吹葢
土地封疆踰越往古始則韓彭蒞醢次乃吳楚稱亂然
雖克滅權偏猶足維翰王畿洎咸哀之後威藩陵替君

臣乘茲間隙竊位偷安光武雄畧緯天慷慨下國遂能
除克靜亂復禹配天休祉盛于兩京鼎祚隆于四百宗
支繼絕之力可得而言魏武忘經國之宏規行忌刻之
小數功臣無立錐之地子弟君不使之人徒分茅社實
傳虛爵本根無所庇蔭遂乃三葉而亾有晉思改覆車
復隆盤石或出擁旄節蒞嶽牧之榮入踐台階居端揆
之重然付託失所授任乖方政令不恒賞罰斯濫或有
材而不任或無刑而見誅朝為伊周夕為莽卓機權失

于上禍亂作于下楚趙諸王相仍構釁徒興晉陽之甲
竟匪勤王之師始則為身擇利利未加而害及初乃無
心憂國國非憂而奚拯遂使昭陽興廢有甚奕暴乘輿
幽繫更同羑里胡羯陵侮宗廟丘墟良可悲也夫為國
之有藩屏猶濟川之有舟楫安危成敗義實相資舟楫
且完波濤不足稱其險藩屏式固禍亂何以成其階向
使八王之中一藩繫賴如梁王之禦大敵若朱虛之除
大憝則外寇焉敢憑陵內難奚由竊發縱令天子暗劣

鼎臣奢放雖或顛沛未至土崩何以言之琅琊譬彼諸
王權輕衆寡度長繫大不可同年遂能匹馬濟江奄有
吳會存重宗社百有餘年雖曰天時抑亦人事豈如趙
倫齊罔之葦河間東海之徒家國俱亾身名並滅善惡
之數此非其效歟西晉之政亂朝危雖由時主然而煽
其風速其禍者咎在八王故序而論之總為其傳云耳
議親王令自選國內長吏齊獻王攸奏議曰昔聖王封
建萬國以親諸侯軌跡相承莫之能改誠以君不世居

則人心偷幸人無常主則風俗偽薄是以先帝深覽經
遠之統思復先哲之軌分土畫疆建爵五等或以進德
或以酬功伏惟陛下應期創業樹建親戚聽使藩國自
除長吏而今草創制度初立雖庸蜀順軌吳猶未賓宜
俟清泰乃議復古之制書比三上輒報不許其後國相
上長吏缺典書令請求差選攸下令曰忝受恩禮不稱
惟憂至于官人叙才皆朝廷之事非國所宜裁也其令
自上請之

王渾諫齊王攸之藩疏 伏承聖詔憲章古典進齊王攸為上公崇其禮儀遣攸之國昔周氏建國大封諸姬以藩帝室永世作憲至于公且武王之弟左右王事輔濟大業不使歸藩明至親義著不可遠朝故也是故周公得以聖德光弼幼主忠誠著于金縢光述文武仁聖之德攸于大晉姬旦之親也宜贊皇朝與聞政事實為陛下腹心不貳之臣且攸為人修絜義信加以懿親志存忠貞今陛下出攸之國假以都督虛號而無典戎幹

方之實去離天朝不預王政傷母弟至親之體虧友于
款篤之義懼非陛下追述先帝文明太后待攸之宿意
也若以攸望重于事宜出者今以汝南王亮代攸亮宣
皇帝子文皇帝弟佾駿各處方任有內外之資論以後慮
亦不為輕攸今之國適足長異同之論以損仁慈之美
耳而今天下窺陛下有不崇親親之情臣竊為陛下不
取也若以妃后外親任以朝政則有王氏傾漢之權呂
產專朝之禍若以同姓至親則有吳楚七國逆亂之殃

歷觀古今苟事輕重所在無不為害也不可事事曲設
疑防慮方來之患者也唯當任正道而求忠良若以智
計猜物雖親見疑至于疏遠者亦何能自保乎人懷危
懼非為安之理此最有國有家者之深忌也愚以為太
子太保缺宜留攸居之與太尉汝南王亮衛將軍楊珧
共為保傅幹理朝事三人齊位足相持正進有輔納廣
義之益退無偏重相傾之勢令陛下有篤親親之恩使
攸蒙仁覆之惠臣同國休戚義在盡言心之所見不能

默已私慕魯女存國之志敢陳愚見觸犯天威欲陛下
事每盡善莫萬分之助臣而不言誰當言者帝不納

王敦有無君之心表疏輕慢帝夜召譙王承以敦表示
之曰王敦頃年位任足矣而新求不已言至于此將若
之何承曰陛下不早裁之難將作矣帝欲樹藩屏會敦
表以宣城內史沈充為湘州帝謂承曰湘州南楚險固
在上流之要控三州之會是用武之國也今以叔父居
之如何承曰臣幸託末屬身當宿衛未有驅馳之勞頻

受過厚之過夙夜自厲思報天德君之所命惟力是視
敢有辭焉然湘州蜀寇之餘人物凋盡若上憑天威得
之所莅比及三年請從戎役若未及此雖復灰身亦無
益也于是詔曰夫王者體天理物非羣才不足濟其務
外建賢哲以樹風聲內睦親親以廣藩屏是以太公封
齊伯禽居魯此先王之令典古今之通議也我晉開基
列國相望乃授琅邪武王鎮統東夏汝南丈成總一淮
許扶風梁王迭據關右爰暨東嬴作司并州今公族雖

寡不逮曩時豈得替舊章乎散騎常侍左將軍譙王承
貞素欵亮志存忠恪便蕃左右恭肅彌著今以承監湘
州諸軍事南中郎將湘州刺史初劉隗以王敦威權大
盛終不可制勸帝出諸心腹以鎮方隅故先以承為湘
州續用隗及戴若思等並為州牧承行達武昌釋戎備
見王敦敦與之宴欲觀其意謂承曰大王雅素佳士恐
非將帥才也承曰公未見知耳鈇刀豈不能一割乎承
以敦欲測其情故發此言敦果謂錢鳳曰彼不知懼而

學壯語此之不武何能為也聽承之鎮時湘土荒殘公私困弊承躬自儉約乘葦茨車而傾心綏撫甚有能名敦恐其為己患詐稱北伐悉召境內船乘承知其奸計分半與之敦尋構難遣叅軍桓羆說承以劉隗等專寵今便討擊請承以為軍司以軍期上道承嘆曰吾其死矣地荒人鮮勢孤援絕赴君難忠也死王事義也惟忠與義夫復何求便欲唱義而衆心疑惑承曰吾受國恩義無有貳府長史虞悝慷慨有志節謂承曰王敦居分

陝之任而一旦作逆天地所不容人神所痛疾大王宗室藩屏寧可從其偽耶便宜電奮存亡以之于是與悝及弟前丞相掾望建昌太守長沙王循衡陽太守淮陵劉翼等共盟誓囚桓羆馳檄湘川指期至巴陵零陵太守尹奉首同義謀出軍營陽于是一州之內皆同義舉乃使虞望討諸不服斬湘東太守鄭澹澹敦姊夫也敦遣南蠻校尉魏又將軍李恒田嵩等甲卒二萬以攻承承且戰且守待救于尹奉虞望而城池不固人情震恐

或勸承南投陶侃又云可退據零桂承曰吾舉義衆志
在死節寧偷生苟免為奔敗之將乎事之不濟其令百
姓知吾心耳初安南將軍甘卓與承書勸使固守當以
兵出沔口斷敦歸路則湘圍自解承荅書曰季思足下
勞于王事天綱暫圯中原丘墟四海義士方謀剋復中
興江左草創始爾豈曷惡逆萌自寵臣吾以闇短託宗
皇屬仰豫密命作鎮南夏親奉中詔成規在心伯仁諸
賢扼腕岐路至止尚淺凡百茫然豺狼易驚遂肆醜毒

聞知駭踊神氣衝越子來之義人思自有不命而至衆
過數千誠足以決一旦之機據山海之憤矣然迫於倉
卒舟楫未備魏人李恒尋見圍逼是故事與意違志力
未展猥辱來使深同大趣嘉謀英筭發自深衷執讀周
復欣無以量足下若能卷甲雷赴猶或有濟若有狐疑
求我枯魚之肆矣兵聞拙速未覩工遲季思足下勉之
勉之書不盡意絕筆而已卓軍次楮口聞王師敗績停
師不進人等攻戰日逼敦又送所得臺中人書疏令人

射以示承城內知朝廷不守莫不悵惋劉翼戰死相持
百餘日城遂沒人檻送承荊州刺史王廙承敦旨于道

中害之

唐太宗時議將封建諸侯李百藥上封建論 臣竊聞

經國庇民王者之常制尊主安上人情之大方思闡治
定之規以弘長世之業者萬古不易百慮同歸然命厯
有賒促之殊邦家有理亂之異遐觀載籍論之詳矣咸
云周過其數秦不及期存亡之理在于邦國周氏以鑒

夏殷之長久遵黃唐之並建維城盤谷深根固本雖王
綱廢弛而枝幹相持故使逆節不生宗祀不絕秦氏背
師古之訓棄先王之道踐華恃險罷戾置守子弟無尺
土之邑兆庶罕共治之憂故一夫號呼七廟隳圯臣以
為自古皇王君臨宇內莫不受命上玄飛名帝錄遭遇
興王之運殷憂啟聖之期雖魏武攜養之資漢高徒役
之賤非止意有覬覦推之亦不能去也若其獄訟不歸
菁華已竭雖帝堯之光被四表大舜之上齊七政非惟

情存揖讓守之亦不可固焉以放勛重華之德尚不能
克昌厥後是知祚之長短必在天時政或盛衰有關人
事宗周卜世三十卜年七百雖淪胥之道斯極而文武
之器猶存斯則龜鼎之祚已懸定于杳冥也至使南征
不返東遷避逼禋祀如綫郊畿不守此乃陵夷之漸有
累于封建焉暴秦運距閏餘數鍾百六受命之主德異
禹湯繼世之君才非啟誦借李斯王綰之輩咸開四履
將閭子嬰之徒俱啓千乘豈能逆帝子之勃興抗龍顏

之基命者也然則得失成敗各有由焉而著述之家多
守常轍莫不情忘今古理蔽澆淳欲以百王之季行三
代之法天下五服之內盡封諸侯王畿千乘之間俱為
采地是則以結繩之化行虞夏之朝用象刑之典治劉
曹之末紀綱弛紊斷可知焉刻船求劍未見其可膠柱
成音彌所多惑徒知問鼎請隧有懼勤王之師白馬素
車無復藩籬之援不悟望夷之釁未甚羿浞之灾既罹
高貴之殃寧異申繒之酷此乃欽明昏亂自革安危固

非守宰公侯以成興廢且數世之後王室浸微始自藩
屏化為讐敵家殊俗國異政強凌弱衆暴寡疆場彼此
干戈日尋臺駘之役女子盡鬢靖陵之師隻輪不返斯
蓋畧舉一隅其餘不可勝數陸士衡方規規然云嗣王
委其九鼎凶族據其大邑天下晏然以治待亂何斯言
之謬也而設官分職任賢使能以循良之才膺共治之
寄刺舉分竹何代無人至使地或呈祥天不愛寶民稱
父母政比神明曹元首方區區然稱與人共其樂者人

必憂其憂與人同其安者人必拯其危豈容委以侯伯
則同其安危任之牧宰則殊其憂樂何斯言之妄也封
君列國藉慶門資忘其先業之艱難輕其自然之榮貴
莫不世增淫虐代益驕侈自離宮別館切漢凌雲或刑
人力而將盡或召諸侯而共落陳靈則君臣悖禮共侮
徵舒衛宣則父子聚麀終誅壽朔乃云為已思治豈若
是乎內外羣官選自朝廷擢士庶以任之澄水鏡以鑒
之年勞優其階品考績明其黜陟進取事切砥礪情深

或俸祿不入私門妻子不之官舍頌條之貴食不舉火
剖符之重衣唯補褐南郡太守幣布裹身萊蕪長縣凝
塵生甑專云為利圖物何其爽歟總而言之爵非世及
用賢之路斯廣民無定主附下之情不固此乃愚智之
辯安可惑哉至如滅國殺君亂常干紀春秋二百年間
畧無寧歲次睢咸秩遂周玉帛之君魯道有蕩每等衣
裳之會縱使西漢哀平之際東洛桓靈之時下吏淫暴
必不至此為政之道可以一言蔽焉伏惟陛下握紀御

天膺期啓聖救億兆之焚溺掃氛禳于寰宇創業垂統
配二儀以立德發號施令妙萬物以為言獨照宸衷永
懷前古將復五等而修舊制建萬國以親諸侯竊以漢
魏以還餘風之弊未盡勛華既往至公之道斯革況晉
氏失馭宇縣崩離後魏乘時華夷雜處重之以關河分
阻吳楚懸隔習文學者尚長短縱橫之術習武藝者盡
干戈爭戰之心畢為狙詐之階彌長澆浮之俗開皇在
運因藉外家驅御羣英任雄猜之數坐移時運非克定

之功年踰二紀民不見德及大業嗣文世道交喪先王
人物掃地將盡雖天縱神武削平寇虐兵威不息勞止
未康自陛下仰順聖慈嗣膺寶曆情深致理綜覈前王
雖至道難名言象所絕畧陳梗槩實所庶幾愛敬蒸蒸
勞而不倦大舜之孝也訪安內豎親嘗御膳文王之德
也每憲司讞罪尚書奏獄大小必察枉直咸舉以斷趾
之法易大辟之刑情必隱惻貫徹幽顯大禹之泣辜也
正色直言虚心受納不簡鄙訥無棄芻蕘帝堯之求諫

也弘獎名教敦勸學徒既擢明經于青紫將升碩儒于
卿相聖人之善誘也羣臣以宮中暑濕寢膳或違請徙
御高明營一小閣遂惜十家之產竟抑子來之願不奈
陰陽所感以安卑陋之居去歲凶儉普天饑饉喪亂甫
爾倉廩虛空聖情矜憫勤加賑卹竟無一人流離道路
猶且食啗藜藿樂撒箕箒言必悽動貌成臞瘦公且喜
于重譯文命矜其即序陛下每見四夷款附萬里歸仁
必退思進省凝神勤慮恐妄勞中國以來遠方不藉萬

古之英聲以存一時之茂實心切憂勞跡絕遊幸每日
視朝聽受無倦智周于萬物道濟于普天罷朝之後引
進名臣討論是非備盡肝膈唯及政事更無異辭纔及
日昃必命才學之士賜以清閒高談典籍雜以文詠間以
玄言一夜忘疲中宵不寐此之四道獨邁往初斯實生
民以來一人而已弘茲風化昭示四方信可以期月之
間彌綸天壤而淳朴尚阻浮詭未移此由習之已久難
以卒變請待琢琬成朴以質代文刑措之教一行登封

之禮云畢然後定疆理之制議山河之賞未為晚焉易
稱天地盈虛與時消息況于人乎美哉斯言也

李公緒五等論 蓋為天下任勢而不任人任勢者諸

侯是也任人者郡縣是也五等之制始於黃唐郡縣之
治勑于秦漢守令為政小理察而大勢危諸侯牧民近
多違而遠慮固聖人苞彼小違以據大安然後足以藩
固內外為千百年計得失成敗備在典謨是以其詳可
得而說也三代所以長而且治者積仁義又任勢故也

秦氏所以短而亂者積刑罰而失維持者也漢魚置郡縣
雜而任之所以兩代皆二百年自魏晉以降謀不圖遠唯
事任人不復任勢是故易代殺伐皆不永年易曰悅以
使人人忘其勞孫卿有言不利而利之不如利而後利
之之利世知其為人不如厚己利物不如圖身安上在
于悅下為己存乎利人然跡其衰亾恒在同姓失職諸
侯微弱也故劉頌上書陸機五等論皆欲建立成國令
復古制則不可也何者昔舜禹奠九州然後揖讓契棄

修仁義二三十世下至湯武然後滅秦自非子襄穆蠶食諸侯六七百年始皇之時乃并六國以德者如彼用力者如此甚難故億兆之所咸以為帝者必須天人感應世所不測綿歷代序經數十世乃可得耳故絕希聖僥倖之心及漢祖起于布衣忽成大業乘秦之弊不因父祖所資天地提三尺之劍而取天下夫鑄石者難為功摧朽者易為力其勢然也韓英之徒見漢取天下之易故數年之中反者六七王莽之亂南面者蜂起漢獻

之時稱制者三國又光武曹馬皆自閭閻而升帝位孫
劉二族各據一方逮晉之失御九服分崩以迄于今二
三百年跨州連郡者二十餘姓皆擅假符璽列置百辟
或至數世或盡一身前車雖覆後跡不懲缺望之心死
而無悔其懷不遜之意挾無君之心而日致湮滅者不
可勝紀今若借之以成國假之以勢權則人欲帝王矣
若欲建萬國則宗室功臣朝士外戚亦不止千人矣其
無功德者則無容望封如置數百千國便力强起于驕

奢違度之則反漢氏之初可為殷鑒若盡建諸侯興滅
繼絕是永無亾國一世之後又有子弟功臣無置之地
如此則疎遠者據強國親勲者無尺土此周之所以衰
自漢以來海內士子官京師編名天朝耻為藩職今一
且令背皇闕趨外邦為諸侯陪臣必不可也其雄俊之
人負才之豪當生奸計競尊其主是所謂時移勢異萬
國雖賢不可復建設使黃帝更出亦不議之矣是故孔
子曰周因於殷禮所損益可知當擇宜于今者而用之

耳竊謂宜如漢初置郡國度其強弱遠近領之以牧伯
節之以綱紀大都偶國並后匹嫡皆亂之道也其嗣子
之立也詔旨師旅之興當諮牧伯以防未然若有妄舉
者而皆國除又天朝之威制其越逸子弟之力足為扞
屏選其賢者能者入為公卿出為侯伯此周召晉鄭朱
虛齊梁之為也然則骨肉世疎亦不可久令強盛宜法
主父推恩分封漸次黜之而受封之君輒屬州牧不可
繼于父兄每封世建號使親者恒強疎者稍弱其王侯

無子親嗣大功不得及有過皆從國除還屬郡縣更立子弟親者以君之則朝廷有恃維城有固此萬世之利也

李谿反五等六代論 魏曹元首六代論稱夏殷周與人共治歷世數十秦王獨制二世而亡亦言周氏陵夷侵弱大底非秦廢五等之爵置郡縣之官至晉陸士衡著五等論陳八代秦漢興亡之由言五等之制始于黃唐郡縣之治創自秦漢以為周制萬邦思治郡后圖身

及承微積弊王室遂卑猶保名位祚垂後嗣秦棄道任
術顛沛之釁實由孤立夫百世非可懸御善制不能無
弊侵弱愈于殄祀土崩痛于陵夷欲權其多福取其小
禍總二家之旨皆是五等而非郡縣徒苟救于疾顛而
未免于陵夷也譬猶醫者苟欲救人之死而不能愈其
病苦豈謂知經脉藥石之本決存亡禍福之機乎且陵
夷土崩二患俱免者豈無通論哉但二家不能知耳故
皆引五等之長說郡縣之短元首則言五等藩衛引春

秋勤王之事以為證欲使秦人割裂州國分王子弟使土有常君人有定主士衡又謂五等之國為己土衆皆我人人安我受其利國傷家嬰其病故為己思制郡縣之長進趨之情銳安人之譽遲是以侵百姓以利己損實事以養名故為利圖物以為諸侯享食茅土萬國受世及則南面之君各務其治九服之人知有定主此皆不知之說也夫春秋之時諸侯擅相攘伐苟欲求伯則以正王室為事故曰求諸侯莫如勤王外雖詐忠以邀

名內實包藏禍心以蓄神器此老子所謂將欲弱之必固強之也豈所以為藩衛哉所謂為已思治者誠憂其國傷其家病而致治矣且若國不富兵不强則未出于傷病也若富國強兵彊陵弱衆暴寡蹙而為九并而為七是豈非古制耶故知雖少其力猶益也比身臂則不同矣夫身手者大小常定也諸侯之士變易者也向使臂指能變而為大小于身又烏得而使耶是知五等之制不計于大小強弱皆得擅權獨斷自有卿相恣之則

不遜削之則怨陵夷逆節固必有矣且士衡云勢足者反疾土狹者逆遲夫土狹既不免逆豈過正境土者之灾耶假令小制七國則反有遲速者之小異耳不足稱也豈如郡縣之主權弱勢輕跨有千里負阻山嶠奸謀未畢而身已遷代然而強兵練甲足以禦四夷之患人徒租稅足以備家國之急則未必無土崩之事而秦漢俱敗豈由此耶元首又徵秦之敗于委政趙高誅夷宗族西漢則王氏擅朝排擯宗室後漢則閹豎執衡孤立

于上此乃滅君親臣強之殃而非郡縣之失也設有侯伯之國則有助亂而已焉足賴哉由是觀之五等與郡縣其利害相去遠矣向使早覺悟廢五等世及之法立郡縣可制之符以矯周枉威靈不假于臣下及刑戮強兵耶則必修文武之業設霸王之術設業固則帝位危矣雖各安其國致天子于何地豈可以為思治哉今郡縣或侵百姓損實事然而升降黜陟在于一人比之侯伯固不為大患也又且奉京師之法臬宰輔之威雖職

官遷轉不一而法已定矣五等者世及相承擅更法令如魯作丘甲晉立六軍鄭鑄刑書如此者寔繁天下所以安上之國土非愛事身與子孫也安與不安在于立教化正法令國雖一姓而法已萬變豈所以為知有定主哉由是知曹陸之論所謂藩衛者乃篡逆之萌也思治者乃禍亂之萌也定主者乃不定也夫如是則焉有不為患也昔漢有吳楚七國之患元首乃懲之于高祖封建地過古制引賈誼之言欲衆建諸侯而少其力使

海內若身之使臂臂之使指則下無背叛之心上無誅
伐之事士衡亦謂漢大啓侯王境土踰溢以七國為過
正之灾若然者則班固漢書贊言周制千八百國載記
分天下為九州二百一十國則千八百九十國也公侯
百里伯七十里子男五十里其為褊小以極矣其卒也
強不一一于骨肉以懲秦失去其弊政用其上策如此
則可歷世長遠而夫派強大矣豈有周室陵遲嬴氏土
崩之釁乎

柳宗元封建論 天地果無初乎吾不得而知之也生
人果有初乎吾不得而知之也然則孰為近曰有初為
近孰明之由封建而明之也彼封建者更古聖王堯舜
禹湯文武而莫能去之蓋非不欲去之也勢不可也勢
之來其生人之初乎不初無以有封建封建非聖人意
也彼其初與萬物偕生草木榛榛鹿豕狃狃人不能搏
噬而且無毛羽莫克自奉自衛荀卿有言必將假物以
為用者也夫假物者必爭爭而不已必就其能斷曲直

者而聽命焉其智而明者所伏必衆告之以直而不改必痛之而後畏由是君長刑政生焉故近者聚而為羣羣之分其爭必大大而後有兵德又大者衆羣之長又就而聽命焉以安其屬於是有諸侯之列則其爭又有大者焉德又大者諸侯之列又就而聽命焉以安其封於是有方伯連帥之類則其爭又有大者焉德又大者方伯連帥之類又就而聽命焉以安其人然後天下會於一是故有里胥而後有縣大夫有縣大夫而後有諸

侯有諸侯而後有方伯連帥有方伯連帥而後有天子自天子至於里胥其德在人者死必求其嗣而奉之故封建非聖人意也勢也夫堯舜禹湯之事遠矣及有周而甚詳周有天下裂土田而瓜分之設五等邦羣后布履星羅四周于天下輪運而輻集合為朝覲會同離為守臣扞城然而降于夷王害禮傷尊下堂而迎覲者歷于宣王挾中興復古之德雄南征北伐之威卒不能定魯侯之嗣陵夷迄于幽厲王室東徙而自列為諸侯厥後問鼎之

輕重者有之射王中肩者有之伐凡伯誅萇弘者有之
天下乖盭無君君之心余以為周之喪久矣徒建空名
於公侯之上耳得非諸侯之盛強末大不掉之咎歟遂
判為十二合為七國威分于陪臣之邦國殄于後封之
秦則周之敗端其在此矣秦有天下裂都會而為之郡
邑廢侯衛而為之守宰據天下之雄圖都六合之上游
攝制四海運於掌握之內此其所以為得也不數世而
天下大壞其有由矣亟役萬人暴其威刑竭其貨賄負鋤

謫戍之徒園視而合從大呼而成羣時則有叛人而無
叛吏人怨于下而吏畏于上天下相合殺守劫令而並
起咎在人怨非郡邑之制失也漢有天下矯秦之枉徇
周之制剖海內而立宗子封功臣數年之間奔命扶傷
而不暇困平城病流矢凌遲不救者三代後乃謀臣獻
畫而離削自守矣然而封建之始郡邑居半時則有叛
國而無叛郡秦制之得亦已明矣繼漢而帝者雖百代
可知也唐興制州邑立守宰此其所以為宜也然猶桀

猾時起虐害方域者失不在於州而在於兵時則有叛將而無叛州州縣之設不可革也或者曰封建者必私其土子其人適其俗修其理施化異也守宰者苟其心思遷其秩而已何能理乎余又非之周之事跡斷可見矣列侯驕盈黷貨事戎大凡亂國多理國寡侯伯不得變其政天子不得變其君私土子人者百不有一失在於制不在於政周事然也秦之事迹亦斷可見矣有理人之制而不委郡邑是矣有理人之臣而不使守宰是

矣郡邑不得正其制守宰不得行其理酷刑苦役而萬人側目失在於政不在於制秦事然也漢興天子之政行於郡不行於國制其守宰不制其侯王侯王雖亂不可變也國人雖病不可除也及夫大逆不道然後擒捕而遷之勒兵而夷之耳大逆未彰奸利浚財怙勢作威大刻于民者無如之何及夫郡邑可謂理且安矣何以言之且漢知孟舒於田叔得魏尚於馮唐聞黃霸之明審覩汲黯之簡靖拜之可也復其位可也卧而委之以

輯一方可也有罪得以黜有能得以獎朝拜而不道夕
斥之矣夕受而不法朝斥之矣假使漢室盡城邑而侯
王之縱令其亂人戚之而已孟舒魏尚之術莫得而施
黃霸汲黯之化莫得而行明謹而導之拜受而退已違
矣下令而削之締交約從之謀周於同列則相顧裂眦
勃然而起幸而不起則削其半削其半民猶瘁矣曷若
舉而移之以全其人乎漢事然也今國家盡制郡邑連
置守宰其不可變也固矣善制兵謹擇守則理平矣或

者又曰夏商周漢封建而延秦郡邑而促尤非所謂知
理者也魏之承漢也封爵猶建晉之承魏也因循不革
而二姓凌替不聞延祚今矯而變之垂二百祀大業彌
固何繫於諸侯哉或者又以為商周聖王也而不革其
制固不當復議也是大不然夫商周之不革者是不
得已也蓋以諸侯歸商者三千焉資以黜夏湯不得而廢
歸周者八百焉資以勝商武王不得而易徇之以為安
仍之以為俗湯武之所不得已也夫不得已非公之大

者也私其力於己也私其衛於子孫也秦之所以革之者其為制公之大者也其情私也私其一己之威也私其盡臣畜於我也然而公天下之端自秦始夫天下之道理安斯得人者也使賢者居上不肖者居下而後可以理安今夫封建者繼世而理繼世而理者上果賢乎下果不肖乎則生人之理亂未可知也將欲利其社稷以一其人之視聽則又有世大夫世食祿邑以盡其封畧聖賢生于其時亦無以立於天下封建者為之也豈

聖人之制使至于是乎吾固曰非聖人之意也勢也

宋廖偁封建論

柳子厚為封建論以短封建者誠以

周之亾由立諸侯之過也故曰周之失在制不在政又云諸侯各專其國繼世而理其人之賢不肖不可知而民之理亂亦不可察也又云諸侯世祿在位各據其地則天下雖有聖賢者生無以立於天下如子厚之論是蓋知其本而不知其末知其末而不知其本故以封建為非故曰封建非聖賢之意也勢也又云湯武之所以

不去封建者因其力以得天下故不去也此亦見子厚之感者也夫事有得失理有是非固不易也偁謂聖賢之立封建者道也非勢也周之亂天下非制失也失在政也又謂天下諸侯雖專國繼世而理亦不能亂也雖世祿在位亦不能妨天下之聖賢也又謂湯武之不去封建者實以封建者古之常道也非因其力以取天下而不去也且夫聖賢之立制度皆取法于天地而節制於人使人悉得其所耳當生人之初萬物屯蒙而莫知

其所以理易云天造草昧宜建侯而不寧是也是封建者聖人所以理民之達道觀三代封建之制因地制民因民制祿使大不至於難制小不至無賴是故如身使臂如臂使指上下相制固有不便則封建者固因人之利而為之也夫所謂勢者乃不得已之辭也豈有取法天地節制於人而曰不得已哉以此為勢則天下孰不為勢是則君臣父子夫婦長幼之分皆勢也何止於封建而已乎偁故曰封建者道也非勢也且封建之制地

有差等祿有多少禮樂器物各有分限是故下者不可
上少者不可多降者不可升無者不可有執是而行雖
世未有亂者也若地不必有差等祿不必有多少禮樂
器物不必有分限下者不必下少者不必少降者不必
降無者不必無則未有不亂者也觀周世之末然矣豈
制之失乎是蓋失其政而然也且三代之盛則非不封
建也而不聞亂何封建利於三代之初而不利於三代
之末乎是蓋政存與政失之謂也使周末之天子執丈

武成康之法而不失則文武成康之時也又安得有問
鼎射王之事當夷王而后禮樂征伐天子不能有也安
得諸侯不為逆設使雖不封建未有不亂者也偁故
曰周之亂在失政也且夫諸侯者奉天子之法以理其
國也動靜進退莫不由天子也是故山川神祇有不舉
者為不恭不恭者君削以地宗廟有不順者為不孝不
孝者君絀以爵變禮易樂者為不從不從者君流革制
度衣服者為叛叛者君討夫然則天下諸侯莫敢不為

善也五國為屬屬有長十國為連連有帥三十國為卒卒有正二百一十國為州州有伯天下八州各以其屬屬天子之吏吏以治伯伯以理正正以理卒卒以理帥帥以理長長有不善則帥舉之帥有不善則卒舉之卒有不善則正舉之正有不善則伯伯舉之伯有不善則吏舉之上下相制雖有不肖者固不敢為不善矣設有為者則流矣討矣而不存之於天下也夫然則天下無不善矣偁故曰雖專國繼世而不能為亂也且聖賢之用

與不用繫乎在上者也在上者果其人則能用之果非其人則不能用之此事之固然者也當三代之時不聞有聖賢不居其位當三代之季則然後聖賢有不用者則是用與不用繫於上明矣彼封建者亦所以待聖賢者也安得反妨聖賢哉當聖賢不用之時乃封建失制之時也曰天子之法不必行諸侯之惡不必紕是故天下各據其地而聖賢棄矣觀其然夫豈在於封建是誠制亂之罪也偁故曰雖世祿在位不能妨聖賢若以湯

武不去封建為因其力以得天下則是湯武苟於得天下也孔子以湯武為仁人乎孔子以為仁人則湯武之不苟得可知也且聖賢之心唯欲利後世益天下苟事有利益者雖死焉為之也若封建果不利天下益後世則去之以利益乎天下後世矣又豈肯因而不革況封建者以天下為公也而守宰者示天下以私也封建者與天下共天下守宰者欲以獨制天下為心公私之道昭昭矣而公私之義固有差矣傳故曰湯武之不去封建

者蓋古之常道也非因其力而不去之也且子厚不究天子之法亂而使諸侯叛反以封建為周之失制不究法不亂則不善莫由在位反以繼世不肖致亂為患不究升賢繼不肖為當世常法而反以聖賢不立為慮不究聖賢立法制必取法天地而利人反以立封建為勢不究聖賢之心無所苟反以湯武不去封建為利其力偁故曰子厚之論封建知其末而不知其本也雖然子厚以封建為非者以守宰為是故也以守宰為是者無

他乃曰有罪得以絀有能得以獎朝拜而不讎夕斥之
矣夕拜而不讎朝斥之矣又云漢知孟舒於田叔得魏
尚於馮唐聞黃霸之明審覩汲黯之簡靖使漢室盡封
侯王則孟舒魏尚之術莫得施黃霸汲黯之化莫得行
明謹而道之拜受而退已違矣下令而削之諦交約從
之謀周於同列矣嗚呼若是者子厚果大不明其本也
以是為是則豈封建之世有罪者不得而絀乎有能者
不得而升乎朝拜而不讎夕不能斥之乎夕拜而不讎

朝不能斥之乎若有罪不絀有能不升法制不能拘者皆已亂之世也已亂之世無不失也何止於封建哉已亂而罪之何異惡桀紂之不道而責湯武嫉商均之不肖而非堯舜也於理順乎雖然子厚止知漢之封侯王而不知古之封建也止知漢之封侯王則宜其所謂明譴而道之拜受而退已違矣下令而削之諦交約從之謀周於同列也若古之封建固不至是三代之封建凡天下四海九州二百一十國在夏商則百里極矣國凡

有五等五等之國制度不同同出於天子者也古之一
大國止今之一郡耳是故其力易制其患易救固未有
能為亂者也漢之封侯王則一侯王之地如古之大國
數十則漢豈行封建之法哉乃漢自為之法非封建之
法也若以漢自為之法而疑古封建為短是由以溺咽
之故欲去舟與食者也豈封建果非哉而又孟舒魏尚
黃霸汲黯之輩當三代之時不啻千萬輩在卿大夫之
列安得謂在封建之世則不得伸其才術豈數子者之

才能為太守而不能為他哉而子厚固以為封建則能用之不知意之若何也嗚呼是非得失之理明明若是又何曲為之言也偁非好辨也庶聖人之道少有明耳仁宗時富弼言契丹率以近親為名王將相以治國事掌兵柄今歲荆王之薨識者憂之臣願陛下擇宗室中賢者數人封之內以藩屏王室外以威示四夷時祖宗之後未有封王爵者帝用弼議封秦王廷美子德文為東平王潤王元份子允讓為汝南王燕王德昭孫從諱

為穎國公岐王德芳孫從照為安國公同時封王公者
凡十人


蘇軾秦始皇罷侯置守論 秦初并天下丞相綰等言
燕齊荆地遠不置王無以填之請立諸子始皇下其議
羣臣皆以為便廷尉斯曰周文武所封子弟同姓甚衆
然後屬疏遠相攻擊如仇讎諸侯更相誅伐天子弗能
禁止今海內賴陛下神靈一統皆為郡縣諸子功臣以
公賦稅重賞賜之甚足易制天下無異意則安寧之術

也置諸侯不便始皇曰天下共苦戰鬪不休以有侯王
賴宗廟之靈天下初定又復立國是樹兵也求其寧息
豈不難哉廷尉議是分天下為三十六郡郡置守尉監
蘇子曰聖人不能為時亦不失時時非聖人之所能為
也能不失時而已三代之興諸侯無罪不可奪削因而
君之雖欲罷侯置守可得乎此所謂不能為時者也周
衰諸侯相并齊晉秦楚皆千餘里其勢足以建侯樹屏
至於七國皆稱王行天子之事然終不封諸侯不立疆

家世卿者以魯三桓晉六卿齊田氏為戒也久矣世之
畏諸侯之禍也非獨李斯始皇知之始皇既并天下分
郡邑置守宰理固當然如冬裘夏葛時之所宜非人之
私智獨見也所謂不失時者而學士大夫多非之漢高
帝欲立六國後張子房以為不可世未有非之者李斯
之論與子房何異世特以成敗為是非耳高帝聞子房
之言吐哺罵酈生知諸侯之不可復明矣然卒王韓彭
英盧豈獨高帝子房亦與焉故柳宗元曰封建非聖人

意也勢也昔之論封建者曹元首陸機劉頌及唐太宗時魏徵李百藥顏師古其後有劉秩杜佑柳宗元宗元之論出而諸子之論廢矣雖聖人復起不能易也故吾取其說而附益之曰凡有血氣必爭爭必以利利莫大於封建封建者爭之端而亂之始也自書契以來臣弑其君子弑其父父子兄弟相賊殺有不出於襲封而爭位者乎自三代聖人以禮樂教化天下至刑措不用然終不能已篡弑之禍至漢以來君臣父子相賊虐者皆

諸侯王子孫其餘卿大夫不世襲者蓋未嘗有也近世
無復封建則此禍幾絕仁人君子忍復開之歟故吾以
為李斯始皇之言柳宗元之論當為萬世法也



經濟類編卷八十